

兩台藝人破天荒合演音樂劇

Chantel 青春活力 Tiger 讚好

無綫藝人姚焯菲(Chantel)與ViuTV藝人邱傲然(Tiger)將破天荒合作演音樂劇，兩人昨日出席活動時一齊受訪零尷尬，更互笠高帽！Tiger讚Chantel充滿青春活力，Chantel即禮尚往來讚Tiger跳舞出色。

連詩雅(Shiga)、黃浩然、海兒、「聲夢」歌手Chantel、MIRROR成員Tiger、COLLAR成員Winka等昨日出席音樂劇《三·八》記者會，Chantel與Tiger均首演音樂劇，對於今次兩台藝人合作，Tiger表示：「我覺得呢個就係呢一行好特別嘅一樣嘢，因為唔同嘅Project識到唔同嘅朋友，再去互相學習。」Chantel則稱與所有前輩演員都是首次見面，覺得很新鮮。問到有沒有欣賞對方的作品？Tiger表示有看Chantel的MV，讚她充滿青春活力，Chantel則讚Tiger跳舞勁，Tiger謙稱：「唔得吓人。」

Tiger透露於音樂劇演死神角色很有發揮，可以去慢慢發掘不同的演繹方法。Chantel表示會在劇中唱《戀愛預告》，由於之前在比賽唱過，希望今次帶給觀眾另一番感覺。她又稱飾演渴望初戀來臨的18歲少女，雖然與她年齡一樣，但角色比較外向，她則不想談戀愛，只想專注工作。

Shiga與黃浩然透露於劇中演夫妻，兩人入行多年未接觸過音樂劇，故興奮又緊張，就似回到初入行的感覺。黃浩然笑言會跟Shiga合唱：「太太叫我畀心機唱，唔好失禮。」

Shiga則稱會唱自己的歌，但會用講故事形式獻唱，與以往的演出不同。

海兒否認《中年3》賽果內定

海兒與Winka在劇中演同一個角色，海兒笑言近期不斷苦練廣東話，並自稱手腳不協調：「我嘅專注力只可以放喺四肢嘅其中一肢，但都對自己跳舞有信心，因為我有信念嘅力量。」提到有傳《中年好聲音3》賽果內定，她說：「肯定冇！」至於Winka男友朱芸編幾乎每次得獎發表感受時都會多謝她，Winka說：「我有問過佢，我覺得佢唔係公眾人物，佢係做幕後，有時我都擔心如果佢咁樣公開嘅，驚啲人會當佢係公眾人物，於是佢做好多嘢都被放大咗，所以我有同佢講『你唔使講嘢，呢啲嘢大家知得得囉』，但係我覺得佢好想Sweet吓我，咁我就繼續去支持佢。」



姚焯菲與Tiger互笠高帽。



海兒為音樂劇苦練廣東話。



Winka心痛男友掛住工作，疏忽健康。



黃浩然與連詩雅於音樂劇演夫婦。



林峯人氣爆燈，頻頻出活動搵真銀。

林峯紅館騷 嘉賓賣關子

林峯前晚到澳門壹號廣場為「One Central Loves Macao」藝術展覽進行亮燈儀式，提到快將在紅館開騷，他衷心感謝經理人安排工作，讓他在綵排期間參與有價值的活動：「所謂閉關就係每日做健身同排舞，其實一個月我已經開始呢種生活模式。好多工作都係兩個月前安排，唔會影響演唱會嘅排練進度。」談到昔日好拍檔鍾嘉欣在內地開騷，問到會否邀請對方或「城寨四子」任個唱嘉賓？林峯稱公司早已安排人選，為保持神秘不便透露，並不忘祝嘉欣演出順利。

電影《九龍城寨之圍城》於香港金像獎奪9項殊榮，不過他卻未能稱影帝，林峯說：「我好開心同一班好兄弟、團隊一齊參加當晚嘅盛典，金像獎作為香港演員嘅夢想地，可以參與成為電影一分子，我覺得已經係夢寐以求嘅事。」



盧慧敏人靚聲甜。

盧慧敏愛自己灑脫分手

模特兒出身的盧慧敏(Amy)踩過界，近日推出首支個人單曲《Red Flag》，她以三個造型拍MV，表達愛情三部曲，她說：「第一個係好多Delusion(幻想)、沉咗船、好開心；第二個係發現有問題；第三個階段係決定離開。」問到愛情觀是否與MV的女主角相似？Amy說：「都有相似，但我比MV女主角更快走出呢段唔健康嘅關係，雖然我唔知真正面對時會唔會咁瀟灑，但我覺得任何人都必須先愛自己，因為當你唔識愛自己，又點會有人去愛你呢？」